

Headline	Pelajar disaran elak sertai demo jalanan		
MediaTitle	Sinar Harian (Utara)		
Date	15 Feb 2014	Language	Malay
Circulation	160,000	Readership	509,000
Section	NEWS	Color	Black/white
Page No	20	ArticleSize	130 cm ²
AdValue	RM 416	PR Value	RM 1,248



Pelajar disaran elak sertai demo jalanan

ALOR SETAR - Pelajar institusi pengajian tinggi (IPT) diingatkan agar tidak melibatkan diri dengan demonstrasi jalanan yang dilakukan pihak tertentu.

Menteri Besar Kedah, Datuk Seri Mukhriz Mahathir berkata, keadaan itu tidak menggambarkan bahawa negara ini mengamalkan sistem demokrasi sebenar dan tindakan itu boleh mencetus kacau bilau, huru-hara hingga menyebabkan merosakkan harta benda awam.

"Saya bimbang kadang-kadang orang muda sering dikaitkan mudah terikut emosi berbanding bertindak secara rasional.

"Perkara ini tidak sepatutnya berlaku dalam kalangan pelajar IPT. Sebagai pelajar, kita diajar untuk membuat keputusan berdasarkan fakta dan bukan mendengar sebelah pihak," katanya ketika menutup program Student Leadership Camp 2014 anjuran Universiti Utara Malaysia (UUM) di Dewan TH Hotel, di sini semalam.

Mukhriz juga bimbang pelajar IPT akan terjerumus dalam keadaan yang boleh menjejaskan kepentingan diri dan masyarakat umum di negara ini jika terjebak dalam demonstrasi jalanan.

"Sebagai contoh, kalau kita perhatikan apa yang sedang berlaku di negara jiran. Mereka tidak menggunakan demokrasi sebaliknya memilih kekerasan untuk mengguling kerajaan.

"Ini yang perlu kita lihat semula. Ada puak tertentu yang mengumpul berjuta-juta orang untuk mendesak kerajaan dan sebagainya. Mereka harus ingat, negara kita mengamalkan demokrasi dan ada lebih 11 juta orang yang layak mengundi untuk memilih kerajaan yang memerintah," katanya

Menurutnya, pelajar harus menjadikan contoh dan iktibar insiden yang berlaku di negara jiran supaya tidak berlaku di negara ini.

"Sekarang ini pun, saya sudah dengar ada pihak yang cuba mengamalkan perkara seperti di negara jiran itu. Saya harap pelajar tidak terlibat.

"Kita mempunyai sistem untuk pilih kepimpinan negara. Gunalah demokrasi yang ada untuk kekalkan keamanan dan perpaduan yang kita kecapai selama ini," katanya.